

«Nus essan er prontos sche Trump vegn»

Forum mundial d'economia 2018

DA GION NUTEGN STGIER / ANR

■ **Da preschent fa cunzunt la blera naiv quitads a la polizia chantunala ed a l'armada che segnan per la segirezza tar il Forum mundial d'economia. Oz entschaiva quel a Tavau ed il punct culminant duai esser la visita da Donald Trump, il president american.** Dapi il 1971 stat Tavau il mais da schaner en il center da la politica internaziunala cun avair lieu il Forum mundial d'economia. A partir dad oz fin venderdi proxim tschertgan 70 schefs da stadis, rotschas da minsiters, persunalitads da l'economia, da la scienza e da la cultura soluziuns per meglierar noss mund. Tranter la blera prominenz politica sa chattan er vers 120 uschenumnads «VIP's» che han il dretg d'in schurmetg persunal. Tranter auter segna la polizia chantunala er per la segirezza persunala da *Donald Trump*, il president dals Stadis Unids da l'America. Polizia ed armada segnan dentant er per la segirtad da tuts ils auters participants dal Forum mundial d'economia ed er per la populaziun da Tavau.

Custs supplementars

Walter Schlegel, il cumandant da la polizia chantunala, discorra bain d'in privel pli aut tar la 48avla ediziun dal Forum mundial d'economia, però betg dad indizis concrets. Dapi il 2015 saja il privel s'augmentà ferm e sin fundament da quella raschun hajan la polizia e l'armada adattà il dispositiv da segirezza gist er per il Forum mundial d'economia. *Schlegel* ha ditg che actualmain sa preschientia la situaziun calma, in dals pli gronds problems saja lura la massa naiv. Quella fetschia segir na pli simpla la regulaziun dal traffic, er la montascha da saivs e la rumida da la naiv sin las vias da Tavau, tut quai haja da funcziunar per garantir ina



Il cumandant da la polizia chantunala *Walter Schlegel* (a san.) cun divisunari *Lucas Caduff*.

FOTO G. N. STGIER

tscherta segirezza als participants dal Forum mundial d'economia. *Schlegel* quinta cun custs da 9,5 milliuns francs per la segirtad e quai è bunamain in mez milliun francs dapli, gist er pervia da la rumida da naiv.

Intginas zonas cun ina segirtad superiura

Schlegel ha ditg che la polizia chantunala collavuria ferm cun tuts ils servetschs da segirtad da la Svizra, cun ils corps da polizia da la Svizra orientala ed er d'au-

ters chantuns da la Svizra. Ultra da quai sajan la polizia e l'armada er adina en contact cun las ambassadas a Berna, sco per exempel l'ambassada americana. La pli gronda sfida per la polizia saja cunzunt da porscher als uschenumnads «VIP's» la segirezza duaivla. Quai sajan ils schefs da stadis e da regenzas e las persunas da chasas roialas. A Tavau existan durant il Forum mundial d'economia intginas zonas cun ina segirtad superiura. Quai è il Center da congress ed intgins hotels da tschintg stailas. Controllads

vegnan ils automobilists e lur passagiers sin via en direcziun Tavau e quai da la vart dal Partenz sco er da la Val Alvra. Sche la polizia fa controllas han els da s'identifitgar e quai senza commentari. *Schlegel* ha ditg che cun la visita da Trump saja la segirezza bain per in pau pli auta, dentant strusch blier pli rigurusa che per exempel avant in onn cun la visita dal president da la China. La visita dal president american saja bain ina sfida supplementara e quai per la polizia sco er per l'armada, punctescha *Schlegel*.

93% è na schuldads da professiun

Sustegnida vegn la polizia ferm da l'armada svizra cun ina truppa da 4500 schuldads e da quels è 93% betg schuldads da professiun. Sco ch'è il cumandant da corp, *Aldo C. Schellenberg*, ha ditg saja l'obligaziun principala da l'armada cunzunt da controllar il spazi da sgular enturn Tavau (46 km), il traffic aviatic e lura er da sgular cun helicopters las persunalitads internaziunals da Turitg ubain da Dübendorf a Tavau. Fin a Turitg e Dübendorf vegnan las persunas prominentas cun lur agens jets privats. In ulteriur pensum da l'armada è er il schurmetg da numerus objects a Tavau ed il schurmetg da persunas. Il vicecumandant da l'armada svizra ha cunzunt menziunà la buna collavuraziun cun la polizia, la lavur professiunala e la lavur seriuisa da quellas duas organisaziuns.

A Turitg enstagl a Tavau

La Partida socialdemocratica dal Grischun aveva inoltrà a la vischnanca da Tavau la dumonda per ina demonstraziun encunter la visita da Trump. Quella avessgì lieu puschmaun gievig a la Piazza da la posta a Tavau. La vischnanca da Tavau ha decidì da betg lubir demonstraziuns durant il Forum mundial d'economia. La raschun saja cunzunt la blera naiv e lura er la mancanza da plaz, ha communitgà la vischnanca da Tavau. La Partida socialdemocratica dal Grischun deplorescha ferm quella decisiun, accepta quella tuttina, sche er cun pauc plaschair. La decisiun da la vischnanca da Tavau saja incredibla, scriva *Philipp Wilhelm*, il president da la ps grischuna. Ussa vul la Partida socialdemocratica da noss chantun cun ses commembers sa participar a Turitg a la «Anti Trump Demo».